

Prezantim i Raportit Vjetor 2012 të KLSH në Komisionin e Ekonomisë dhe Financave

Filozofia jonë e punës bazohet në katër shtyllat e Strategjisë së Zhvillimit 2011-2017 të EUROSAI-t (komunitetit të institucioneve më të larta të auditimit të jashtëm publik –SAI- të Evropës). Këto drejtime themelore janë: (1) Ndërtimi i kapaciteteve audituese; (2) Respektimi rigoroz i Standardeve profesionale të INTOSAI; (3) Shkëmbimi i njohurive dhe eksperiencave mes SAI-ve dhe (4) Menaxhimi në përputhje me parimet e qeverisjes së mirë dhe komunikimit efektiv.

Në vitin 2012 plotësuam të gjitha ato detyra të Strategjisë sonë të Zhvillimit 2009-2012, të cilat kishin mbetur pezull, të tilla si:

- përgatitja e amendimeve të Ligjit tonë organik;
- zhvillimi i auditimit të performancës;
- përsosja e metodologjisë së auditimit, si dhe
- rritja, nëpërmjet trajnimeve, e kapaciteteve audituese të institucionit.

Korniza e re ligjore për KLSH, Ju është dorëzuar në Kuvendin e Shqipërisë, në fund të Nëntorit 2012. Gjate vitit të kaluar, auditimet e performancës u katërfishuan, duke u nisur nga një bazë shumë e vogël. Manuali i Auditimit të Performancës u rikonceptua tërësisht i ri dhe numri i ditëve të trajnimit për punonjës të KLSH u nëndëfishua, në krahasim me vitin 2011.

Raporti Vjetor i Performancës i KLSH që Ju kemi paraqitur në zbatim të detyrimit kushtetues, përmbledh rezultatet që institucioni ka arritur gjatë 2012-ës, duke i krahasuar me ato të një viti të mëparshëm buxhetor, si dhe me realizimin e rekomandimeve që Ju na keni dhënë, për të përmirësuar punën tonë. Me konkretisht:

1. Në Rezolutën e Kuvendit “Për Vlerësimin e Veprimtarisë së KLSH për vitin 2011”, të datës 26 prill 2012, Ju na keni rekomanduar për *“Kryerjen e kontrolleve ndaj përdorimit të fondeve të Buxhetit të Shtetit, si dhe fondeve të projekteve të financuara nga BE-ja e nga institucionet financiare ndërkombëtare me objektivitet, profesionalizëm, cilësi dhe efektivitet të lartë”*. Këto kërkesa janë në një linjë me drejtimin e katërt themelor të Strategjisë së EUROSAI-t, menaxhimit në përputhje me parimet e qeverisjes së mirë.

Gjykojmë se e kemi zbatuar këtë rekomandim Tuajin, duke realizuar gjatë 2012-ës **177 auditime** nga **153 të planifikuara** dhe duke **përfunduar plotësisht 158 auditime**.


Këto auditime i kemi kryer në 40 institucione qendrore, në 64 njësi vendore, 12 drejtori dhe degë tatimesh e doganash, 12 shoqëri anonime dhe me kapital të përbashkët, 11 njësi dhe projekte me financim të huaj, 11 njësi të administrimit dhe rregjistrimit të pronës dhe 8 institucione të mbrojtjes së mjedisit.

Duke zbatuar kërkesat e Deklaratës së Simpoziumit të 22-të të INTOSAI-t në mars 2013 në Vjenë, e cila nënvizon se *“Institucionet supreme të auditimit publik duhet t'i kryejnë auditimet e tyre në një mënyrë që lejon ndërmarrjen e veprimeve korrigjuese, për të marrë kompensim, ose për të ndërmarrë hapa për të parandaluar-ose të paktën të bëjnë më të vështirë-shkeljet financiare”*, si KLSH gjatë auditimeve të kryera në vitin 2012 (me periudhë 2-3 vjeçare aktiviteti të njësisë që auditohet), **kemi vërejtur parregullsi dhe shkelje financiare në të ardhurat e mbledhura dhe në shpenzimet e kryera nga njësitë publike**

të audituara, institucione të Pushtetit Qendror dhe Vendor, me dëm¹ ndaj Buxhetit të Shtetit në shumën 13,522,392,000 lekë, ose 97.3 milionë euro. Kemi rekomanduar që kjo shumë të zhdëmtohet në masën 100 përqind.

Vlera e dëmit ekonomik të zbuluar për periudhën 5-vjeçare (2008-2012), paraqitet si më poshtë:

Grafiku Nr. 1:



Në totalin e dëmit ekonomik të konstatuar, subjekti AlbPetrol Sh.a. ka 68 përqind të tij, ndërsa KESH Sh.a. 18 përqind.

Dëmi ekonomik, përfshirë moslikujdimin e detyrimeve kontraktore ndaj Albpetrol dhe KESH sh.a. për vitin 2012, paraqitet si vijon:

Grafiku Nr. 2:



¹ Dëm ekonomik ndaj Buxhetit të Shtetit është dëmtimi i pronës apo fondeve publike, me pasojë uljen e vlerës në treg të pronës dhe pakësimin e fondeve publike

Kemi zbuluar po ashtu shkelje të disiplinës financiare² me ndikim negativ në performancën e subjekteve të audituara, në shumën e përgjithshme 1,842,998,000 lekë, ose 13.2 milionë euro.

Në totalin e shkeljeve të disiplinës financiare me ndikim negativ në performancë, shkeljet në koncesionet e dhëna nga Ministria e Ekonomisë, Tregtisë dhe Energjitikës përbëjnë 60.4 përqind.

Shkeljet financiare janë vërejtur kryesisht në prokurimet publike, në shitjen dhe dhënien me qira të pasurisë shtetërore, në urbanistikë, në shpenzimet operative, në doganat, në tatimet e taksat, etj.

Impakti, dobia e auditimit përfaqëson vlerën totale të zbulimeve të konstatuara, evidentuara e të raportuara, në përfundim të auditimeve të evaduara nga data 1 janar 2012 deri më 31 dhjetor 2012, gjithsej 158 auditime, në shumën totale 13,522,392,000 lekë (rreth 13.5 miliardë lekë). Në këtë shumë janë përfshirë të gjitha vlerat e parregullsive dhe shkeljeve financiare me dëm ekonomik, përfshirë moslikujdimin e detyrimeve kontraktore ndaj Albpetrol dhe KESH sh.a. në shumat respektive 9.1 miliardë lekë dhe 2.4 miliardë lekë, të cilat zenë rreth 86% të totalit të zbulimeve të konstatuara gjatë vitit 2012.

Raporti ndërmjet vlerës së dëmit ekonomik gjithsej të konstatuar dhe evidentuar gjatë vitit 2012, në shumën totale 13,522,392,000 lekë të kërkuar për zhdëmtim, dhe vlerës të raportuar me situacionin përfundimtar të shpenzimeve të KLSH-së për këtë vit në shumën 261,461,000 lekë, tregon për shkallën efektivitetit të veprimtarisë audituese të KLSH, dhe konkretisht: **“Për çdo lek të investuar në KLSH gjatë vitit 2012, janë kërkuar për t’u zhdëmtuar 51.7 lekë”**.

Krahasuar me një vit më parë ku ky raport ka rezultuar 27.7 lekë, konstatohet një rritje prej 24 lekë ose në masën 87% më shumë.


Tregues tjetër është vlera e shkeljeve financiare me pasojë dëm ekonomik të zbuluar mesatarisht nga 1 (një) punonjës i KLSH-së, në raport me vlerën që harxhon shteti për 156 punonjës gjithsej, përkatesisht rreth 86.7 milionë lekë/për çdo punonjës (13,522 milionë lekë/156 punonjës); nga rreth 1.7 milionë lekë të harxhuar mesatarisht për çdo punonjës në organikë (261 milionë lekë/156 punonjës).

2. Duke zbatuar kërkesat e Deklaratës së Tbilisit në Konferencën e VII-të të EUROSAI dhe OLACEF, në shtator 2012 që” Institucionet supreme të auditimit publik të kontribuojnë ndjeshëm për arritjen e një qeverisjeje të mirë, duke dhënë rekomandime me qëllim përforcimin e menaxhimit publik” dhe në zbatim të rekomandimit Tuaj të Rezolutës së 26 Prillit për “përmirësimin e akteve ligjore e nënligjore dhe rritjen e shkallës së zbatimit të rekomandimeve të KLSH”, në vitin 2012 kemi sjellë **58 propozime për përmirësim të legjislacionit, përfshi dhe kërkesën për një ndryshim në Kushtetutë, nga të cilat **25** propozime janë zbatuar, ndërsa **16** janë në proces zbatimi. Kemi rekomanduar **2,194 masa organizative**, nga të cilat janë zbatuar **1,659 ose 76 përqind** e tyre, si dhe kemi rekomanduar **1,221 masa disiplinore dhe administrative**, nga të cilat **860 ose 70 përqind** janë realizuar**

² Shkelje e disiplinës financiare me ndikim negativ në performancë është e ardhura e munguar në Buxhetin e Shtetit, e cila do të ishte arkëtuar në rast se nuk do të kishte ndodhur shkelja

që gjatë vitit 2012. Ndërsa niveli i përmbushjes së rekomandimeve tona për përmirësime ligjore, masa organizative, ato disiplinore dhe administrative është i mirë, masat për largime nga puna të punonjësve të gjetur me shkelje, veçanërisht të drejtuesve të rangut të lartë, janë në nivel mjaft të ulët (kemi propozuar 120 largime nga puna dhe vetëm 53 janë kryer). Ky nivel i ulët ka ardhur nga serioziteti i pakët i njësive të audituara në ndëshkimin e shkelësve të ligjit brenda stafit të tyre, sidomos për shkelës të nivelit të lartë. Na del një detyrë e rëndësishme për këtë vit që të ngremë në një nivel të pranueshëm këtë tregues shumë të rëndësishëm për formimin e kulturës së ndëshkueshmërisë në administratën publike.

Grafiku Nr.3



3. Ne Rezoluten e 26 Prillit, Ju na keni rekomanduar përmirësimin e ligjit tone integral. E kemi zbatuar këtë rekomandim Tuajin, si dhe rekomandimin e Progres Raportit 2012 të BE-së për Shqipërinë, i cili thekson se: *“Auditimi i jashtëm duhet të vijë në nivel me standardet e INTOSAI... Pas disa viteve në ngecje, projekt-ndryshimet në Ligjin për KLSH për ta sjellë atë në përputhje të plotë me standardet e Organizatës Ndërkombëtare të Institucioneve Supreme të Auditimit (INTOSAI) janë përgatitur dhe janë dorëzuar në procedurë të miratimit”*. Sikurse e permenda, gjatë vitit 2012 plotësuam përgatitjen e draft-amendimeve të ligjit tonë organik, në bashkëpunim intensiv me Drejtorinë e Përgjithshme të Buxhetit në BE (DG-Budget), me SIGMA-n dhe me ambientet akademike e shoqërinë civile të vendit. Nga tryezat e punës që organizuam, rezultuan sugjerime të vlefshme që u reflektuan në draftin përfundimtar, dorëzuar Kuvendit të Shqipërisë më 30 nëntor 2012 me shkresën nr. 945/4, datë 26.11.2012. Sipas vlerësimit të DG-Budget, ky draft është *“tërësisht në përputhje me standardet INTOSAI* (Letër me Nr. Prot. 1354284 (2012) e z. Robert Gielisse, Drejtor i Njesisë së Tatimit të Vleres se Shtuar dhe Kontrollit Financiar te Brendshem Publik në DG-Budget, drejtuar KLSH më datën 16 nëntor 2012).

Amendimet sjellin një konceptim bashkëkohor, si simotrat tona evropiane, të të drejtave dhe detyrave që kemi. Ato do të ndihmojnë në:

- rritjen e nivelit të zbatimit të rekomandimeve tona;
- shtimin e kapaciteteve administrative;

- saktësimin e së drejtës që të auditojmë fondet e akorduara nga BE për Shqipërinë deri tek përdoruesi i fundit dhe;
- saktësimin e së drejtës të certifikojmë llogaritë financiare të njësive të audituara.

Amendimet forcojnë pavarësinë tonë funksionale, duke e shndërruar KLSH në një strukturë tërësisht të integruar dhe në përputhje me standardet e veprimit të SAI-ve të vendeve të Bashkimit Evropian, si dhe mundësojnë që të kemi Auditues Publikë (të jashtëm) të certifikuar. Ne besojmë se Ju do të na mbështesni.

Ne mendonim që këtë draft-ligj Ju do ta vendosnit në axhendën e fillimvitit të Kuvendit. Kërkoj nga Ju të na ndihmoni që amendimet e ligjit tonë të shqyrtohen në një kohë sa më të afërt nga Kuvendi.

4. Duke zbatuar rekomandimin Tuaj, të përmbajtur në Rezolutën 26 Prillit për *“Rritjen e efikasitetit të veprimtarisë audituese, nëpërmjet fuqizimit të auditimit financiar dhe hedhjes së hapave më të shpejtë drejt auditimit të performancës”*, si dhe detyren e planit strategjik të KLSH 2009-2012, të papërmblusur në vitet 2009-2011, si KLSH vitin e kaluar rritëm numrin e auditimeve financiare të mirëfillta dhe shtuam ndjeshëm numrin e auditimeve të performancës. Sikurse e thekson një personalitet i auditimit suprem evropian, z. Jacek Jezierski, President i Zyres Kombëtare të Auditimit (NIK) të Polonisë, *“SAI-t nuk janë qeveri që të propozojnë dhe të vënë në zbatim linja veprimi, por mbasi një linjë veprimi është propozuar dhe zbatuar, mbasi fondet publike janë shpenzuar, SAI-t veprojnë për të dhënë informacione të besueshme mbi atë që po ndodh”*. Në shtator 2012, ngritem Departamentin e Auditimit të Performancës, me në krye një studiues të doktoruar në menaxhimin e riskut, si dhe me 16 auditues ndër ata më me përvojë dhe me auditues të rinj me perspektivë. Edhe pse e kemi katërfishuar numrin e këtyre auditimeve vitin e kaluar, sikurse e përmenda, nisur nga një bazë shumë e vogël, na ngelet ende shumë për të bërë. Ndajmë bindjen se duke shtuar auditimet e performancës, do të arrijmë të ndikojmë me gjetjet dhe rekomandimet tona në planifikimin më efikas të politikave dhe programeve qeveritare për shërbimet ndaj qytetarëve.


5. Duke zbatuar rekomandimin Tuaj, të përmbajtur në Rezolutën e Kuvendit dhe detyren në Planin tonë Strategjik të Zhvillimit 2009-2012 për *“Përmirësimin e metodologjisë së kontrollit, mbështetur në standardet ndërkombëtare e praktikën më të mira të vendeve të tjera”*, si dhe në bazë të standardit ISSAI 20, kemi përditësuar Manualin e Auditimit të Performancës, të ndërtuar tërësisht mbi rezultatet dhe udhëzimet e Grupit të Punës së INTOSAI. Me qëllim përmirësimin e metodologjisë së auditimit dhe të raportimeve tona, ngritëm në shkurt 2012 Departamentin e Kërkimit Shkencor, Zhvillimit dhe Teknologjisë së Informacionit. Gjatë vitit 2012 institucioni aplikoi dhe fitoi një projekt binjakëzimi për zhvillimin e metodologjisë dhe kapaciteteve të tij audituese, në kuadër të financimeve IPA 2012, me vlerë 2.11 milionë euro, i cili do të bëhet veprues në fillim të vitit 2014. Ky projekt fitohet pas gjashtë vitesh që institucioni nuk kishte marrë asistencë teknike të huaj. Ndihmë në fitimin e këtij projekti na dha dhe Qeveria shqiptare, veçanërisht Kryeministri dhe Ministria e Integritetit, Delegacioni i BE në Shqipëri dhe SIGMA, partneri ynë permanent.

6. Ekziston një perceptim negativ i publikut në lidhje me nivelin aktual të korrupsionit në administratën publike. Ky perceptim vjen nga moszbulimi dhe mosndëshkimi i korrupsionit në nivel të mjaftueshëm nga ana e organeve shtetërore përgjegjëse për ta luftuar këtë dukuri. Sikurse e ka nënvizuar një tjetër personalitet i auditimit publik, Prof. Assoc. Dr. Rejai Akyel, President i Gjykatës së Llogarive të Turqisë në fjalën e tij në Konferencën e EUROSAI-OLACEF në Tbilisi, *“Përgjegjësia kryesore e institucioneve supreme të auditimit është që të*

kontribuojnë në transparencën dhe llogaridhënie në menaxhimin e fondeve publike”. Detyrat për institucionet publike shqiptare janë të veprojnë si institucione të forta dhe të pavarura dhe të thellojnë luftën kundër korrupsionit. Kjo për ne si institucion suprem auditimi merr kuptim krejt të veçantë.

Si KLSH, gjatë vitit 2012 kemi kryer **40 kallëzime penale për 125 punonjës** të administratës shtetërore të niveleve të ndryshme, ose pothuajse 2 herë më tepër se sa 3 vitet 2009 (9 kallëzime)-2010 (5 kallëzime) dhe 2011 (6 kallëzime) të marra së bashku.

Grafiku Nr.4



Në këto kallëzime ka Drejtues të Lartë si Drejtor Kabineti në Ministri, Drejtora të Përgjithshëm në Ministri, Kryetar të Komisionit të Prokurimeve Publike, Kryetarë apo ish-Kryetarë Bashkish, drejtues të lartë në institucionet në rrethe, etj, por jemi të ndërgjegjshëm që kemi ende shumë për të bërë për të luftuar aktet abuzive dhe korruptive të çdo niveli.

Puna jonë shkon në sinkron me Strategjinë Ndërsektoriale të Parandalimit, Luftës kundër Korrupsionit dhe Qeverisjes Transparente 2008-2013 të qeverisë Berisha, e cila kërkon një bashkëpunim më të ngushtë të institucioneve kryesore që e luftojnë korrupsionin, të bazuar në angazhime të përbashkëta të institucionalizuara. Urdhëri nr. 70, datë 18.04.2006 i Kryeministrit për Zbatimin nga ekzekutivi të masave të propozuara nga KLSH na ka ndihmuar së tepërmi, megjithëse ai duhet të zbatohet më saktë dhe i plotë nga institucionet e audituara.

Gjatë vitit 2012 jemi përpjekur të krijojmë sinergji institucionale për mirëqeverisjen, duke bashkëpunuar në sistem me institucionet e tjera shtetërore. Në mars 2012, nënshkruam një marrëveshje bashkëpunimi me Inspektoratin e Lartë të Deklarimit dhe Kontrollit të Pasurive të funksionarëve të lartë të shtetit dhe një me Autoritetin Shqiptar të Konkurrencës, me synimin e zhbirimit të çdo rasti pasurimi të shpejtë të funksionarëve, si dhe të rasteve të prishjes së konkurrencës në tenderat shtetërorë. Në qershor 2012, nënshkruam marrëveshjen e bashkëpunimit me Prokurorinë e Përgjithshme. Prokuroria ka nisur hetimet për të gjitha kallëzimet tona, duke treguar seriozitet ndaj denoncimeve tona, gjë që prodhon përgjegjshmëri dhe shton transparencën, si dhe, sikurse e ka theksuar Presidenti i Republikës, SHTZ. Bujar Nishani ne adresimin ne Analizen Vjetore 2012 te KLSH: “Ky bashkëpunim, ky përkushtim, kjo dëshirë dhe ky vizion i shprehur tashmë në sy të opinionit publik për një


bashkëpunim më të ngushtë ndërmjet institucionit tuaj dhe Prokurorisë së Përgjithshme, do të sjellë shembuj konkretë në sytë e opinionit publik”.

7. Në zbatim të rekomandimit Tuaj, të përmbajtur në Rezolutën e Kuvendit për *“Harmonizimin e veprimtarisë së kontrollit të jashtëm me atë të brendshëm, si dhe zhvillimin dhe forcimin e sistemit të menaxhimit financiar dhe kontrollit”*, kemi iniciuar në maj 2012 marrëveshjen e bashkëpunimit me Ministrinë e Financave, sidomos me strukturat e saj të auditimit të brendshëm. Kjo marrëveshje është në veprim dhe do të realizohet e plotë gjatë këtij viti në objektivat e saj kryesore, në bazë të standardeve ISSAI 9150 për *“Koordinimin dhe bashkëpunimin midis SAI-ve dhe Audituesve të brendshëm në Sektorin Publik”* dhe 1240 për *“Pergjegjesite e audituesit lidhur me mashtrimin në auditimin e deklaratave financiare”*. Një funksionim i konsoliduar i Auditimit të Brendshëm ndihmon shumë realizimin e misionit të KLSH. Puna në sistem me strukturën e Kontrollit të Brendshëm Financiar Publik (PIFC), me Auditin e Brendshëm nëpërmjet këshillimeve të vazhdueshme, shkëmbimit të planeve të punës, zhvillimit të metodologjive, trajnimeve dhe kryerjes së veprimtarive të përbashkëta e deri në përdorimin e gjetjeve të tij, kur kjo punë cilësohet se është kryer në përputhje me standartet profesionale, gjykojmë se është rruga e duhur për të mbështetur maksimalisht rritjen e përgjegjshmërisë, transparencës dhe ndershmërisë në qeverisje.


Sfida jonë kryesore, modernizimi i institucionit, realizohet duke koordinuar si duhet punën me institucionet e tjera, publike dhe jo-publike të fushës. Në përmbushje të objektivit të platformës strategjike të caktuar në dhjetor 2011 për institucionin, kemi siguruar bashkëpunim profesional me Institutin e Ekspertëve Kontabël të Autorizuar (IEKA) dhe me Këshillin Kombëtar të Kontabilitetit, me të cilët kemi nënshkruar marrëveshje bashkëpunimi, për të na ndihmuar në kryerjen e analizës së riskut në planifikimin e auditimeve, në rritjen e cilësisë gjatë procesit auditues dhe në raportimin cilësor të gjetjeve të auditimit. Pse jo, në të ardhmen, nëse Ju si Kuvend nuk do të keni mundësi, këto institucione të pavarura ekspertësh do të auditojnë fondet tona si institucion, që të realizohet detyrimi ligjor për një auditues të jashtëm të veprimtarisë së KLSH.

8. Në zbatim të rekomandimit Tuaj për *“Zhvillimin e burimeve njerëzore, duke i dhënë përparësi zgjerimit dhe përmirësimit cilësor të veprimtarisë trajnuese”*, gjatë vitit 2012 kemi rekrutuar sipas të gjitha rregullave të punësimit në administratën publike rreth 30 punonjës të rinj, ndër të cilët pesë me gradën shkencore Doktor i Shkencave dhe tetë me nivel pasuniversitar të Programit Master, në vazhdim të doktoraturës. Kemi lidhur, duke filluar nga muaji shkurt 2012 e në vijim, marrëveshje bashkëpunimi me institucionet simotra të zhvilluara të auditimit më të lartë publik. Si rezultat i zbatimit të këtyre marrëveshjeve, gjatë vitit 2012 u trajnuan jashtë shtetit një numër audituesish të KLSH i barabartë me numrin e punonjësve të institucionit të dërguar jashtë gjatë shtatë viteve 2004-2011 të marra së bashku. Duke realizuar edhe trajnime me ekspertë të SIGMA në Tiranë për auditimin e performancës, auditimin financiar dhe auditimin e teknologjisë së informacionit dhe trajnime me burime të brendshme, vitin 2012 e mbyllëm me **19.4 ditë trajnimi** për auditues në KLSH (nga vetëm 2.1 ditë trajnimi në vit për auditues, që kishim trashëguar nga viti 2011), tregues në nivel me treguesit e ditëve të trajnimit në vit për auditues të SAI-ve më të zhvilluara në kontinent.

Grafiku Nr.5



Grafiku Nr.6



9. Në zbatim të rekomandimin Tuaj, të përmbajtur në Rezolutën e Kuvendit për “*Rritjen e transparencës ndaj medias dhe shoqërisë civile, si dhe rritjen e bashkëpunimit me botën akademike*”, kemi trajtuar **358 letra dhe ankesa nga qytetarët** për probleme të ndryshme, nga të cilat **111 i kemi konstatuar jashtë kompetencave dhe juridiksionit të KLSH**, kurse nga **247 kërkesa dhe ankime** në kompetencë të institucionit, **171** prej tyre i kemi verifikuar dhe u kemi dhënë përgjigjen përkatëse, ndërsa **76** janë në vijim të verifikimit. Ndërsa për vitin 2011 institucioni ka rregjistrime, të dhëna tejet të ulta në shifra për letrat dhe ankesat e ardhura nga qytetarët. Si rezultat i këtyre ankesave të marra dhe të trajtuara gjatë vitit 2012, KLSH ka larguar katër auditues të tij, dy nga të cilët i ka paditur në Prokurori për shpërdorim detyre.

Mbi bazën e parimit të 8-të të ISSAI 20, i cili thekson se :” *SAI-t komunikojnë në kohë dhe gjerësisht për aktivitetet e tyre dhe rezultatet e auditimeve nëpërmjet medias, faqeve në internet dhe mjeteve të tjera të komunikimit masiv*”, Kemi qenë tërësisht të hapur ndaj mediave dhe kemi bashkëpunuar me to, duke dyfishuar numrin e editorialeve, njoftimeve për shtyp dhe artikujve dhe rritur me 3.5 herë numrin e sekuencave filmike televizive, në krahasim me vitin 2011. I falenderojmë në mënyrë të veçantë mediat dhe shoqërinë civile,

aleatet tane me potente. Sikurse e ka nënvizuar Simpoziumi i 22-të i INTOSAI i mbajtur ne Mars 2013 në Vjenë ”SAI-t te komunikojne dhe promovojne ndergjegjesimin e qytetareve dhe mediave rreth gjetjeve dhe rekomandimeve te SAI-ve”, duke realizuar jo vetem njoftime per shtyp, por bashkëpunime konkrete.

KLSH gjatë 2012-ës ka bashkëpunuar intensivisht me botën akademike, sidomos me profesoratin e Fakultetit Ekonomik dhe Fakultetit Juridik të Universitetit Shtetëror të Tiranës në tryeza pune, takime konsultative, etj, bashkëpunim i cili është i mirë, por ende nuk po institucionalizohet për arsye procedurale burokratike.

Për rritjen e transparencës dhe efijencës në auditim, institucioni ka nënshkruar marrëveshje bashkëpunimi me disa nga OJF-të më të spikatura për transparencën dhe luftën kundër korrupsionit, si Transparency Internacional në Shqipëri, lëvizja Alternativa Civile, Qendra për Transparencë dhe Informim të Lirë, Instituti i Studimeve Bashkëkohore, Instituti për Demokraci dhe Ndërmjetësim, Lëvizja Evropiane Shqipëri dhe Instituti “G&G Group”. Nga OJF-të kërkojmë jo vetëm bashkëpunim për transparencë, por edhe të marrin pjesë aktive në auditimet tona në çdo faze te procesit te auditimit, qe ato do ta mendojne.

Po në zbatim të parimit 8-të të ISSAI 20 për komunikimin aktiv e profesional të një SAI edhe nëpërmjet publikimeve, gjatë vitit 2012 institucioni përgatiti dhe publikoi 10 botime informative dhe profesionale, si: “KLSH-Analiza Vjetore 2011”, “KLSH në Kuvend”, “KLSH-Analiza 6-mujore 2012”, “EUROSAI dhe SAI-t Evropiane”, “Standardet ISSAI 1, 10, 11, 20, 30, 40, 100 dhe 200”, “Historiku i KLSH 2925-2012”, tre numra të revistës shkencore “Auditimi Publik” dhe Manualin e përditësuar të Auditimit të Performancës.

Më 28 dhjetor 2012, KLSH zhvilloi Konferencën e tij të parë Shkencore, duke ju referuar historikut të institucionit dhe punës shumëvjeçare të të gjithë personave që kanë kontribuar për ngritjen dhe mbarëvajtjen e tij në periudha kohore të ndryshme, me rastin e 100 Vjetorit të Pavarësisë. Konferenca dha mesazhin e ruajtjes së identitetit dhe vlerave të institucioneve kryesore të Shtetit, si bazë për formësimin e kulturës së konsoliduar shtetërore. Ky aktivitet për këtë vit dhe vitet në vijim synon të kthehet në një traditë dhe forum profesional përfaqësues eksperiencash auditimi, si për auditimin e jashtëm dhe atë të brendshëm publik, duke sjellë edhe përvojën audituese të institucioneve homologe të zhvilluara në rajon dhe më gjerë.

Si përfundim, theksoj se jemi përpjekur gjatë vitit 2012 të realizojmë rekomandimet Tuaja, thellësisht të bindur në dobishmërinë e tyre dhe përputhjen me objektivat tona strategjike. Natyrisht, jemi të vetëdijshëm se duhet të punojmë më shumë.

Në bashkëpunim me ekspertë të SIGMA, kemi përgatitur Planin e Zhvillimit Strategjik të KLSH për vitet 2013-2016, i cili përmban objektivat kryesorë, si:

- përmirësimi i bazës ligjore dhe rregullatore të KLSH, në përputhje me standardet INTOSAI dhe praktikat më të mira evropiane;
- përmirësimi i metodologjisë dhe rritja e cilësisë në auditim;
- përmirësimi i cilësisë dhe shtimi i numrit të auditimeve të performancës, krahas konsolidimit të auditimeve të përputhshmërisë dhe atyre financiarë;
- sigurimi i mirëqeverisjes, si dhe rritja e përgjegjshmërisë dhe llogaridhënies për një menaxhim të shëndoshë financiar.

Bashkëpunimi i gjerë dhe i thellë me Ju, Kuvendin e Shqipërisë, me qytetarët dhe shoqërinë civile, me Qeverinë dhe me të gjithë partnerët e tjerë kombëtarë dhe ndërkombëtarë, mbi bazën e motos së INTOSAI *“Experientia mutua Omnibus prodest”* (Nga eksperiencia e përbashkët përfitojnë të gjithë), përbën për ne garancinë më të plotë në suksesin e objektivave dhe përpjekjeve tona edhe gjatë vitit 2013.

Si KLSH, një nga përparësitë tona për vitet në vijim është të garantojmë që korniza e re ligjore e jona do të zbatohet si duhet, kur të miratohet nga Ju, Kuvendi i Shqipërisë.

Duke Ju falënderuar për mbështetjen që i keni dhënë institucionit të Kontrollit të Lartë të Shtetit gjatë vitit 2012, shpresojmë që ky Raport të kontribuojë jo vetëm në forcimin e llogaridhënies tonë, por edhe në rritjen e ndërgjegjësimit Tuaj, të Kuvendit në tërësi për dobinë e auditimeve të KLSH dhe rolin e pazëvendësueshëm parandalues ndaj korrupsionit dhe mashtrimit financiar që institucioni luan, në një linjë me Rezolutën e Kombeve të Bashkuara të 22 Dhjetorit 2011 për Fuqizimin e SAI-ve, e cila u kërkon shteteve anëtare të OKB-së dhe parlamenteve të tyre *“të mbështesin SAI-t të kryejnë detyrat e tyre në mënyrë objektive dhe efektive, duke qenë të pavarura nga subjekti i audituar dhe të mbrojtura nga ndikimet e jashtme”*, si dhe *“të intensifikojnë bashkëpunimin me SAI-t, duke përfshirë ndërtimin e kapaciteteve me qëllim nxitjen e qeverisjes së mirë, duke siguruar përgjegjshmëri, efikasitet, efektivitet dhe transparencë”*.

Ju faleminderit!